

www.BibleForChildren.org

Panagnaan 3




Na awon lalla looy si' yana si Adam.
Kuwan nda na, lay awnan na si
Hawa. Hatiyan awon na ilay, "llum,"
batan iya na silay bbo' sikamimon
manusiya'.



Na ni mimon sattuwa tawun ma bay pinapayak me' Tuhan, ya' luu bay akkahan labi man sō. Dari disu llaw, lai sō looy pa mman danda looy, yuk na, “Bana kilay lay kam binandaan le' Tuhan ya' noho' mangan buwa' oy-oy ja' kayu ni tinanom tuu?”



Yuk danda looy,
“Kakakan baw bilay
kami buwa' siga kayu
ni tinanom tuu. Suga'
bay baw kami binandaan me' Tuhan ya'
noho' mangan buwa' kayu looy disu ma
ni tangngaan tinanom tuu. San murut,
ya' du dari. Bong kami
kono' bay kakakan atawa
murut, masti' matoy ja'
kami.”



Suga' yuk sō looy,
“Ē, ya' baw kam bilay
matoy. Arapun ngkon
kam ilay bay binandaan
me' looy batan katoonan Tuhan bong kam
bay na kakakan, masti' buka' na pamiki bi.
Maka sumibu' na du kam niiya kasayu
mahap-maat.”



Na ni lilingan danda looy, kagak-gāk
inanda' poon kayu looy maka buwa'
na bantuk mahap lassa na bong
kinakan. Sarī gi, doman ya kole'
pangahati lawom bong ya bay
kakakan. Dari si' ilooy
ma lay du ya ngattu'
bo' na mangan.



Pag-anu, lay gi buwanan na Ila na sampay lay du mangan. Dari si', buka' du pamiki da nilang mahap-maat sampay tasayu da na ga nantang sila. Dari si', lay sila nahi' dawun kayu man da napsan baran da.





Pag-anu si', lay llinganan lalla looy me' Tuhan, yuk na, “Ninggai do' tu man nu?” Pag tampung lalla looy, “Pag bay takale ku si' bahunus nu lumān, lay ko tapukan ku. Tawu ku takita nu nantang.”





Yuk Tuhan, “Pooy baw tu me' nu kasayu ga nantang ko? Lay na kina ko kakakan buwa' kayu looy ma bay bandaan ku ya' noho' kinakan?”



Iya tampung lalla looy si', "Taksi danda tee baw ba si' ma bay pabuwat nu limbang ku bay muwanan aku. Ilooy silay kon ku bay kakakan."

Pag-anu, tinilaw na baw me' Tuhan danda looy si', yuk na, "Ongoy ko bay buwat me' looy?" Tampung danda looy baw si', "Lay ku ba la takole' inakkahan le' sō looy. Ngkon ku bay kakakan."



Dari lay na sila pinō' me'
Tuhan man tinanom-tinanom
looy ni Eden. Maka lai na si
Adam sinoho' buwat pa tana'
ma bay man mapayak iya.





Lay ja' si' sila pinō', lay na baw Tuhan
nganna' siga tukang nganjaga lakka
man sulga' inawnan Serabim
ndooy ni Eden huwin pa
mataallaw.





Maka luu gi bay inanna'
ndooy me' Tuhan katali' apihan noleyab
maglabaran pa dambila' pa dambila'.
Kon me' looy supaya ya' na luu
kapilay pa poon kayu looy ma
kabuwan kaallum
saumu-umu
buwa' na.




Na song hallom, lay na battong si Hawa le' si Adam.
Pag maddi si Hawa, lalla. Dari yuk na, “Man tabang
Tuhan anakan na ku la lalla.” Pag-anu, lay awnan
na si Kayin.




Ya' gi hallom, lay na baw ya hanak balik disu lalla,
yana si Habil. Pag mehe na sila, kuwan si Habil, lay
dari tukang ipat bili-bili. Kuwan siyaka na si Kayin,
tukang huma.




Hallom maka hallom na, pag kattom si Kayin tinanom na, lay ya nong kasohean buwa' na pa Tuhan. Kuwan ari' na si Habil, lay numbali' disu anak sibuwa ni baanan bili-bili na, bo' songan na isi na ma numbul satu pa Tuhan.



Dari Tuhan si' tu kasulutan ni si Habil sampay ni ilooy ma bay sinongan niiya. Bo' si Kayin, ya' kasulutan Tuhan niiya sampay ni ilooy ma bay songan na. Pag tabista si Kayin me' looy, mandung imukka na sampay tud dugahan na ya.



Na disu ilaw, yuk si Kayin ni si Habil, “Hongang te' ku Di' pilay pa huma.” Takka da ndooy, lay pinapatoy me' si Kayin ari' na.



Dari tilaw Tuhan ni si Kayin, “Ninggai na ari' nu?” Iya tampung si Kayin, “Tau ta la. Sa' du baw bilay suku' ku nganjagahan ari' ku.” Dari si', tud lay na du lakka si Kayin man okoman Tuhan, sampay lay na ya maglayin pa lahat inawnan Nod pa mataallaw man Eden.



Beleng ta pa si Adam ka nda na, lay na baw sila anakan balik lalla. Yuk si Hawa, “Kahapan la, lay gi baw ku binuwanan me' Tuhan anak lalla ganti' si Habil bay pinapatoy me' si Kayin.” Dari lay inawnan me' na si Set.



Paddus si Set bay pinamaddihan, lay gi pasampun umu si Adam wawu' hatus taun, sampay luu gi anak na sarī, danda-lalla. Na bong tinibuuk umu si Adam labbasakayi, luu siyam hatus tallumpū' taun bo' na lay matoy.



Ga anak da ilay mehe-langkaw ja' mimon maka
tanyag paglallahan. Me' jama ngawnan
bangsa da, Nepilim. Na hallom maka
hallom na, ni lilingan Tuhan, bidda'
na jahallis manusiya' batan isu-isu
kalaatan tulun
njawom pikilan




da llaw-llaw.



Dari sasso na ga Tuhan bay mapayak manusiya'
ta' junya' sampay lassa hansu na ga atay
na nganda' kadarihan da. Sangkon yuk
na, "Ya' na situ pabiya ku manusiya'
humallom ta' junya' me' bay
hallang-hallangan tuu.


Subay ya' na




pinalabi man
dahatus duwampū'
taun umu da.”



Maka yuk Tuhan lagi, “Gam na katisan ku manusiya' man ta' babaw junya' sampay ga kahayop-hayopan, ga manuk-manuk ka mimon balnyawa ma palele ta' gumi. Sasso na ku bay mapayak sila.”



Suga' Iuu gi baw disu lalla kasulut ni Tuhan,
yana si Nū. Na ituu batnaa yana salsila si Nū ka
paglūng na. Iya ilay anakan tallu lalla,
yana ga si Sem, si Ham, ka si Japet.



Si Nū ilay jama intong, bo' lungbid lagi ka Tuhan. Ni mimon manusiya' ta' junya' jaman looy, isu-isu iya ya' luu sutsutan njata' na.



Bidda' na sina ehe ase' Tuhan ni
manusiya'. Sangkon lay na pinaglilla' me'
na Anak tungga na pinapatoy supaya
soysoy pitsaya' niiya ya' na tanalka',
gam pin kole' gi kasampulnaan
nyawa ma ya' luu
katapusan na.



Rom 3:23

Na mimon ina manusiya' lay ja' bay buwat dusa.
Sangkon sali'-sali' sila ya' luu pangabut-ngabut
da ni kaayaran Tuhan.

Rom 6:23

Dan jinis me' halling, bong ina jama buwat dusa, masti' luu
ja' ka hisab na, yana katiksaan nyawa labba man junya'
sampay pa ahirat. Bo' sagannap ma tibuuk ka Papu' tabi
si Isa Almasi, masti' binuwanan ja' sina me' Tuhan
ladjiki', yana kasampulnaan nyawa saumu-umu.

Hibrani 9:27

Na bong inawnan manusiya', ndang lay na sina ginanta'
ninsila matoy sakayi du. Pag-anu, bo' da
hinukum me' Tuhan.



Epesus 2:8,9

Ni kaehe ase' Tuhan, lay na kitabi sinalamat me' na sabap me' tabi pitsaya' ni Almasi. Suga' kasalamatan tabi ina, sa' ga tungbas ni bay hulas-sangsā' tabi buwat mahap, arapun ladjiki' man Tuhan. Sangkon, ya' sina luu dapat tabi ngabbu saula-ula tawop kitabi sinalamat me' Tuhan man sabapan hāp pabuwatan tabi.

Rom 10:9,10

“Bong kam mā' ni pagkahi bi manusiya' si Isa yana Papu' sampay bana-bana kam pitsaya' lay ya pinakallum me' Tuhan pabalik, selamat na sina kam. Batan bong ina jama bana-bana pitsaya' ni si Isa, malaingkan initung ya intong. Damikiyan, bong ya mangaku mme' ni si Isa, selamat na du ya.



Yahiya 3:16,17

Bidda' na sina ehe ase' Tuhan ni manusiya'. Sangkon lay na pinaglilla' me' na Anak tungga na pinapatoy supaya soysoy pitsaya' niiya ya' na tanalka', gam pin kole' gi kasampulnaan nyawa ma ya' luu katapusan na. Tuhan ilay bay mapitu Anak na pa junya', maksud na nalamat manusiya', sa' ga ngalabuan sila hukuman.

1 Yahiya 5:11-13

Palman Tuhan ina ningkitabi me' tuu: Lay na ya muwanan kitabi kaallum bahau, yana kasampulnaan nyawa ma ya' luu katapusan na. Bo' kaallum looy ilay lakka man Anak na. Sangkon soysoy tibuuk ka Anak na, luu na kaallum looy mman na. Suga' soysoy ya' tibuuk ka Anak na, ya' du luu kaallum looy mman na. Ituu tu si' man ku nuwat pa mman bi ma pitsaya' ni Anak Tuhan supaya katoonan bi na tud luu na kasampulnaan nyawa bi ma ya' luu katapusan na.



Panagnaan 3 – 6

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: M. Maillot, Tammy S.

Mapun Bible (sjm) © 2021, Wycliffe Bible Translators, Inc.
All rights reserved.

<https://www.bible.com/bible/3121/GEN.1.SJM>

©2026 Bible for Children, Inc.

www.M1914.org

www.bibleforchildren.org

